

CARTA JA NI NTEE SAN PABLO APOSTOL NUU NCHIVI ÑUU COLOSAS

1 ¹Maá nī cúu Pablo, apóstol Jesucristo, chi súcuán nī jětahān inī Yāa Dios nī ntají yā nduhū. De ndúū ni jín hermano ō Timoteo ²tée nī carta yáhá cuēē nūū ndá ndóhó nchivī ñuū Colosas, jā cúu nú nchivī maá yā jā cándíja vāha nūū Cristo. De ñúhún inī ndúū ni jā Tatá ó Yāa Dios ná sáhá cā yā jā vāha ndá nú, de sáhá yā jā coo ndeé coo sii inī nū.

Jā jícān táhvī Pablo jēhē nchivī cándíja

³De tá jícān táhvī ndúū ni nūū Yāa Dios, Yāa cúu Tatá maá Jētohō ō Jesucristo, de níní nácuētáhvī nī nūū yā jā síquī ndá ndóhó.

⁴Chi nī jini nī tūhun nāsa vāha cándíja nú Cristo Jesús, jín nāsa cúndáhvī inī nū ndācá nchivī maá yā.

⁵Chi ñúhún inī ndá nú jā nīhīn nū jā ñúhún vāha jondē andiví cuu nú. Chi tá nī jini nú tūhun ndāā jā scácu yā ndóhó, de nī nquijéhé ndá nú ñúhún inī nū.

⁶De tūhun ñúcuán jā ní nacani ndá nūū nū, chi ndúcuahā cuāhān de nīhīn tīnú ní cáhnú ñayiví. De suni súcuán nī nsāhá jín ndá nú jondē quiví jā ní jini nú de nī jicūhun inī nū jā ndāā cúu jā vāha ndasí inī Yāa Dios jín nú.

⁷Chi tūhun ñúcuán cúu jā ní stéhēn Epafras nūū ndá nú, tēe jā sátínú jín nī jā mānī ni jín. De cúu dē tēe sátínú jā squíncuu vāha nūū Cristo jā jító dē ndá nú.

⁸De maá dē nī ncachī tūhun nūū ni síquī ndá nú, nāsa cúndáhvī inī nū táhán nú sáhá maá yā.

⁹Jā ñúcuán cúu jā suni nduú jéncuīñī ndá nī jā jícān táhvī ni jēhē nū, jondē quiví jā ní nīhīn ni tūhun ñúcuán de jondē mitan. De jícān ndá nī nūū yā jā ná jicūhun vāha inī nū de coo ndíchí nú jín tūhun yā, sáhá maá Espíritu, tácuā cunī nū ndihi nāsa jětahān inī maá yā.

¹⁰De jícān táhvī ni jā caca ndāā nū tá cúu nūū cánuú jā caca nú jā cúu nú nchivī maá Jētohō ō. De súcuán de sáhá nú ndihi jā jětahān inī yā, de nīhīn tīnú nú jín ndācá tiñu vāha, de jicūhun cā inī nū nāsa Yāa cúu Yāa Dios.

¹¹De jícān ndá nī jā cuāha yā fuerza inī nū, tá cúu nūū íyó fuerza maá yā jā viī cúñáhnú yā. De súcuán de cuu cuandee inī nū jín ndācá-ni tündóhó, de cusiī ndasí inī nū.

¹²De cuu nacuetáhvī nú nūū Tatá ó, chi maá yā nī nchihi fuerza yóhó jā iin cáhnú-ni jín ndá nchivī maá yā nīhīn ō tāhvī ō. Chi jíca ó jín luz yā jā yíhí ó ndahá yā.

¹³Chi nī scácu yā yóhó jā ní nchihi ó ndahá maá jā tíin poder nūū neē, de nī squívi yā yóhó ndahá Sēhe yā jā mānī yā jín, jā tatúnī yā nūū ō.

¹⁴Chi maá Sēhe yā nī scácu yóhó jā ní jihī yā jēhē ō, de nī nee cáhnú inī yā nūū cuáchi ó.

Jā ní nsāhá Cristo jā ní ndivi ó nūū tūhun jā mānī Yāa Dios jín ó

¹⁵Yāa Dios jāá nduú cúu cunī ō nūū, nī nsāhá yā jā ní nquiji Sēhe yā, de súcuán nī jinī ō maá yā. De Sēhe yā chi ja íyó yā jondē ncháha ca jēcōo ndācá jā íyó.

¹⁶Chi jín Sēhe yā nī nsāhá Yāa Dios ndihi jā ní jēcōo, ndihi jā íyó andiví jín jā íyó ñayiví, jā jín ō nūū jín jāá nduú jín ō nūū. De suni nī nsāhá yā ndācá ángel jā ndácu tiñu, jín jā ndíso tíñú, jín jā cúñáhnú, jín jā tíin poder. Jín Cristo nī nsāhá Yāa Dios jā ní jēcōo ndihi, de jā cuu Cristo cúu.

¹⁷De ja íyó Cristo jondē ncháha coo ndihi jā íyó. De ndahá maá yā yíhí vāha ndihi-ni.

¹⁸De maá yā cúñáhnú nūū nchivī cándíja, tá cúu nūū cúñáhnú xīnī nūū yiqui cúñu, chi modo yiqui cúñu yā cúu ji jā iin-ni cā cúu ji jín yā. De maá yā sáhā jā cutecū ji níí cání, de xihna cā maá yā nī natecū mähñú ndiyi, tácuā cuñáhnú yā nūū ndācá-ni.

¹⁹Chi nī ncusiī inī Yāa Dios jā ndihi-ni nāsa cúu yā jā cúu yā Yāa Dios, suni súcuán cúu Cristo.

²⁰De sīquī jā ní jihī Cristo, de nī ncusiī inī Yāa Dios sáhā yā jā ndivi ndācá-ni nūū tūhun jā mānī yā jín, ndācá jā íyó ñayiví jín jā íyó andiví. Chi jín jā ní jihī Cristo yicā cruz, de nī nsāhá Yāa Dios jā ndivi ndācá-ni nūū tūhun jā mānī yā jín.

²¹De ndá máá nú, chi sín sīquī nī iñi nú jondē saá, de nī jinī ūhvī nū yā inī ánō nū, chi maá-ni tiñu néhén nī nsāhá ndá nú. De mitan chi ja nī nsāhá Yāa Dios jā ní ndivi nú nūū tūhun jā mānī yā jín nú.

²²Súcuán nī nsāhá yā sīquī jā ní nsōcō Cristo maá yā nī jihī yā, tácuā coo ndoo coo iī nū jā cuiñi nú nūū yā, de mā cōó téhén nú, de nduú nā cuáchi coo sīquī nū.

²³De súcuán sáhā yā tú cuiñi nīhin nú jā candíja vāha nú, de tú quendōo nīhin nú jín tūhun vāha jā ñúhún inī ndá nú jā scácu yā ndóhó, de mā siáa

cuitī nū. Chi tūhun ñúcuán nī jini ndá nú, de nī jītē nuu nī cáhnú ñayiví. De suni jétínú yā nduhū Pablo jā nácani nī tūhun ñúcuán.

Jā jétínú yā Pablo jēhē nchivī cándíja

²⁴De mitan de cúsiī inī nī jā ndóho nī jēhē ndá nú. Chi jín yiqui cúñu nī ndóho nī jā cúmanī cā ndoho nī jín Cristo jēhē nchivī cándíja, suu nchivī jā cúu tá cúu yiqui cúñu yā.

²⁵De cúu nī tēe jā jétínú Yāā Dios jēhē nchivī cándíja, chi súcuán nī ntetínú yā nduhū, tácu nácani ndihi nī tūhun yā nū ndá nú de quendōo vāha nú.

²⁶De nácani nī tūhun yā jā ní nchiyuhū, jāá nduú ní jín nchivī jondē janahán ndasí de jondē ní cání vāji. De mitan de ja nī stéhēn cājí yā tūhun ñúcuán nū nchivī maá yā.

²⁷Chi nī ncusiī inī yā jā stéhēn yā nū ji nāsa cúcuíca ndasí ji jín ndihi jā ndíso tūhun yáhá jā ní nchiyuhū jā vii cúñáhnú, de cūtē nuu quihín nū ndācá nación jāá nduú jín. De tūhun jā ní nchiyuhū yáhá cúu jā ndēe Cristo inī ánō nū, de sáhá yā jā ñúhún inī ndá nú ndācá jā vii ñáhnú jā coo.

²⁸De suu tūhun Cristo cúu jā nácani ndá nī, de sndíhvī inī nī ndācá nchivī, de stéhēn nī tūhun yā tácu jícūhun vāha inī ji. De súcuán de cuja vāha inī ndiviī ji jā yíhí ji ndahá Cristo Jesús.

²⁹De sīquī ñúcuán cúu jā sátínú nī, chi ndíhvī inī nī nácani nī tūhun jín ndācá fuerza Cristo jā chindee chítuu yā nduhū.

2¹Chi cúnī nī jā ná jícūhun inī ndá nú nāsa ndúcú ndēe ndasí nī jēhē nū, jín jēhē nchivī ñuū Laodicea, jín jondē ndācá nchivī jāá nduú ní jín cuitī nū nī.

²Chi cúnī nī jā coo ndēe inī ánō ji, de inuú-nī cundeē mānī ji, de jícūhun ndihi inī ji nāsa cuíca ndasí ji jín tūhun jā cándíja nihin ji. Chi cunī ji nāsa Yāā cúu Cristo, chi maá yā cúu tūhun Yāā Dios jā ní nchiyuhū.

³De inī Cristo yíyuhū ndācá tūhun jā cúcuíca nú jín, suu tūhun ndíchí jín tūhun jícūhun inī.

⁴De súcuán cáhān nī jín ndá nú, tácu mā stáhvī nī iin ji ndóhó jín ndācá tūhun stáhvī jā vii cáhān.

⁵Chi vísō íyó jíca nī jín nú, de ñúhún inī nī ndá nú, de cúsiī inī nī jín nī nāsa jíca ndāā ndá nú de cándíja nihin nú Cristo.

⁶Túsaá de tá cúu nū ní jetáhvī ndá nú jā Jētohō nū cúu Jesucristo, suni súcuán caca ndāā nū jín yā.

⁷De ná tīn vāha tūhun yā inī nū, de ná cúja vāha nú jín tūhun jā cándíja nú yā, tá cúu nū ja nī jín ndá nú. De níní nacuetáhvī nú nū Yāā Dios.

Jā ndújeé ó sáhá Cristo

⁸Coto má cuāhá ndá nú tūhun jā stáhvī ni iin nchivī ndóhó jíin tūhun ndíchí jāá nduú jétíñú, jíin tūhun nduxí stáhvī. Chi nduú cándíja ndá ji tūhun Cristo, chi sa cándíja ji ndācá costumbre jíin ndācá modo jā stéhēn nchivī inī ñayiví yáhá.

⁹Chi ndihi-ni nāsa cúu maá Yāā Dios, suni sūcuán cúu Cristo.

¹⁰De ndihi-ni nāsa cúu Cristo, suni sūcuán cúu ndá máá nú, chi yíhí nú ndahá yā. De maá yā cúñáhnú nū ndācá jā cúñáhnú jíin jā ndíso tíñú andiví.

¹¹De sīquī jā yíhí nú ndahá yā, suu cúu modo jā ní ncuu nú circuncidar. De jā sūcuán nī nsāhá yā circuncidar ndá nú, chi nsūú iin tunī jā ndēē yiqui cúñu nú cúu, chi sa jā ní nsāhá ndoo yā ndācá cuāchi jā ní nsāhá nú jíin modo nēhén maá nú. Chi sūcuán cúu jā sáhá Cristo circuncidar yóhó.

¹²De jā ní jenduté ndá nú cúu modo jā ní nchiyuhū nū jíin Cristo, de suni modo jā ní natecū nū jíin yā. Chi nī ncandíja ndá nú jā jíin poder Yāā Dios nī nastécū yā Cristo māhñú ndiyi.

¹³Chi nī ncuu ndá nú modo ndiyi nū yā sīquī cuāchi nú, chi ncháha ca sáhá yā circuncidar ánō nū jondē saá. Sochi mitan de nī nsāhá Yāā Dios jā cutecū nū ní cání jíin Cristo, chi nī nee cáhnú inī yā nū ndācá cuāchi nú.

¹⁴De modo jā íyó iin acta jā cáhān cuāchi sīquī ō jā ní stíví ó ley yā. De nī sndáhvā yā acta ñúcuán, chi nī nchunáá Cristo cuāchi ó jā ní jīhī yā yicā cruz.

¹⁵Chi tá nī jīhī yā yicā cruz, de nī ncandēē yā ndihi poder ndācá jānēhén jā cúñáhnú jíin jā tíin poder. De nī ncandēē yā jāá nduú cā cúñáhnú, chi nī nsāhá yā jā cuāhān ndá nū quindasī, de sūcuán nī stéhēn yā poder yā.

Ná cúndihvī inī ō jā quendōo vāha ó jondē andiví

¹⁶Túsaá de mā cuétáhvī ndá nú de tú cáhān nchivī cuāchi sīquī nū, sīquī iin jā yájī nū á jā jíhi nú, á jāá nduú née iī nū quivī vico jíin quivī núcōsō yōō jíin quivī nátātú.

¹⁷Chi ndācá ley sīquī ñúcuán nī jetíñú maá-ni jondē ncháha ca quiiji Cristo. De mitan de ja nī nquiiji yā de nduú cā jīni ñúhún.

¹⁸Mā cuáha ndá nú tūhun jā casī ni iin nchivī jā nīhīn nū tāhvī nū. Chi chíñúhún ji ndá ángel yā, de cáhān ji jā sūcuán sáhá suchí ji maá ji. De cáhān ji jā jīnī ndija ji jā íyó ndāā tūhun nácani ji, de nduú. De sūcuán sáhá téyíí cāhá ji maá ji, chi jāni nēhén inī ji.

¹⁹De nduú íñí ji jíin Cristo, Yāā jā cúñáhnú nū nchivī jā cúu tá cúu yiqui cúñu yā, chi iin-ni cā cúu ji jíin yā. Chi maá yā scuáhnu yā ji jíin tūhun yā, de ndúu inuú inī ndācá ji jā jíja ji cuāhān ji, tá cúu nū ní jāni inī Yāā Dios.

²⁰De modo jā ní jīhī ndá nú jín Cristo, cúu jā ní nsiáā nū ndācá costumbre jā stéhēn inī ñayiví. ¿Túsaá de nūcu sáhá cā ndá nú tá cúu nū sáhá nchivī ñayiví jā cándíja nú ndācá jā ndácu ji?

²¹Chi cáhān ndá ji: Mā quēhé nú yáhá, mā cājí nú ñúcuán, ni mā tíin nú, cáchī ji.

²²De maá-ni jā ndácu nchivī jín costumbre maá ji cúu, sochi nduú níhīn tínú jā quendōo ndāā nchivī.

²³De ndāā chi jáni inī ji jā tūhun ndíchí cúu ndá ñúcuán, chi sáhá jín ji jā chíñúhún níhīn ji, jín jā sáhá suchí ji maá ji, jín jā sndóho ji yiqui cúnu ji. Sochi nduú níhīn tínú cuitī jā casī ndācá jā nēhén jā cúnī ji sáhá ji.

3 ¹Túsaá de tá cúu nū ní natecū Cristo, suni súcuán nī natecū ndá nú, jā ní ncuu nú modo ndīyi nī nsāhá cuāchi nú. De cundihvī inī ndá nú sīquī ndācá jā íyó andiví nū ndéē Cristo lado cuáhá Yāā Dios nū cúñáhnú yā.

²De canī inī nū sīquī ndācá jā íyó andiví, nsūú sīquī jā íyó inī ñayiví.

³Chi modo ja nī jīhī ndá nú jín Cristo, de mitan chi modo jā tēcū nū jín yā andiví, chi yíhí nú ndahá Yāā Dios.

⁴De quīvī jā nenda Cristo, Yāā jā sáhá jā cutecū ō ní cání, ñúcuán de suni quenda nijīn ndá nú jín yā, de viī cuñáhnú nú jín yā.

Nchivī jā jīca jín modo jā cúnī maá, jín nchivī jā ní ndujeé

⁵Túsaá de casī ndá nú ndācá modo jā cúnī maá nú jā íyó nú inī ñayiví yáhá: Mā cācá ndīi nū, mā sáhá nú tínu téhén, mā ndíyo inī nū sáhá nú ndācá tínu nēhén, mā cútóó nú, mā ndíyo inī nū ndatínú. Chi ndācá ndatínú jā ndíyo inī ō cúu tá cúu ídolo jā chíñúhún ó.

⁶Chi sīquī ndācá tínu yáhá cúu jā cuāha Yāā Dios castigo xēēn nū nchivī jā níhīn inī nū yā.

⁷De suni jín tínu yáhá nī jīca ndá nú jondē saá, tá nī nsāhá nú súcuán.

⁸Sochi mitan de sndóo nú ndācá yáhá: Jā quítī inī, jā xēēn inī, jā sáhá tínu nēhén, jā cáhān nāvāha nū táhán, jín jā cáhān ndācá tūhun jāá nduú vāha.

⁹Mā stáhvī ndá nú táhán nú, chi ñúcuán nī ncuu modo maá nú jā ní jīca nú jín jondē saá, de ja nī sndóo nú.

¹⁰De nī nduu ndá nú nchivī jeé, cuāndacu nú maá Yāā jā ní nsāhá ndóhó, de cuājicūhun vāha inī nū nāsa Yāā cúu yā.

¹¹De nchivī jā ní ndujeé nduú cā cúu ji nchivī griego, ni nchivī hebreo, ni nchivī jā ní ncuu circuncidar, ni nchivī jāá nduú ní ncúu circuncidar, ni nchivī ñuū jīcá, ni nchivī yucú jā íyó naā, ni mozo jā ní jeen nchivī, ni nchivī sátínú cuenta maá, chi inuú-ni cúu ndihi ji nū yā. Chi Cristo cúu Jētohō ndihi ji, de ndéē yā inī ánō ndihi ji.

12 Chi nī nacāji Yāa Dios ndá ndóhó jā cuu nú nchivī maá yā jā mānī yā jíin. Túsaá de níní cundáhvī inī nū táhán nú, de coo vāha inī nū jíin táhán nú. De sáhá suchí nú maá nú, de coo vitá inī nū, de coo paciencia inī nū.

13 Cuandee inī ndá nú jíin táhán nú, de cune cáhnú inī nū nūū ji de tú nā cuá nī nsāhá ji nūū nū. Chi tá cúu nūū ní nee cáhnú inī Cristo nūū nū, suni súcuán sáhá ndá máá nú.

14 De jā cánuú cā cúu jā cundáhvī ndasí inī nū táhán nú. Chi ñúcuán sáhá jā ndúu inuú inī nū de jíja vāha inī nū jíin tiñu vāha.

15 De tūhun jā cundee mānī ná cúnuú inī ánō nū sáhá Yāa Dios. Chi nī ncana yā ndá nú jā nduu nú iin-ni cā nchivī jā cundee mānī nū. De níní nacuetáhvī nú nūū yā.

16 De scuáha vāha ndá nú tūhun Cristo tácuā cunuú tūhun yā inī ánō nū. De stéhēn nū nūū táhán nú, de sndíhvī inī nū ji jíin ndācá tūhun ndíchí yā. De jíin salmo jíin himno, yaā īī jā cáhān tūhun yā, cata vii nū jā nácuetáhvī nú inī ánō nū nūū Yāa Dios.

17 De ndācá tiñu jā sáhá nú, tú jā cáhān nū á jā sáhá nú cúu, ndihi sáhá nú tácuā nduñáhnú síví maá Jētoho ō Jesús, de nacuetáhvī nú nūū Tatá ó Yāa Dios sáhá yā.

Nāsa cánuú squíncuu nchivī cándíja nūū táhán ji

18 Ndá ndóhó ñahan jā cúu ñasíhí, cuetáhvī nú nūū yíí nú, chi súcuán cánuú sáhá nú sīquī jā cándíja nú Jētoho ō.

19 De ndá ndóhó tēe cúu yíí, cundáhvī inī nū ñasíhí nú, de mā cútucu inī nū jíin ña.

20 Ndá ndóhó sēhe, ndācá-ni tiñu candíja nú nūū tatá nú nūū naná nú, chi súcuán cúsiī inī maá Jētoho ō.

21 De ndá ndóhó tatá, mā squítī inī nū sēhe nú, tácuā mā cúcuécá inī ji.

22 Ndá ndóhó mozo, ndācá-ni tiñu candíja nú nūū patrón nū ñayiví yáhá. Mā sátíñú vīxī nū maá hora jā jínī dē tácuā cuetúhún dē ndóhó. Chi ndāa de vāha sátíñú nú, de cundihvī inī nū jā má stíví nú nūū Yāa Dios.

23 De ndācá tiñu jā sáhá nú, de cusii inī nū sáhá nú, de canī inī nū jā nūū maá Jētoho ō sátíñú nú, nsūú nūū nchivī.

24 Chi ja jínī ndá nú jā maá Jētoho ō cuāha yā cuāhā tāhvī cuu nú níí cání. Chi nūū maá Cristo sátíñú ndá nú, chi maá yā cúu Jētoho nū.

25 Sochi nchivī jā sáhá tiñu néhén, chi sa ndutahvī ji sīquī jā ní nsāhá ji. Chi nduú sáhá Yāa Dios cuenta nāsa cúu iin iin nchivī, chi inuú sáhá ndāa yā sīquī ji.

4 ¹Ndá ndóhó patrón, vāha ndāa sáhá nú jíin mozo nū. De nūcūhun inī nū jā suni íyó Jētoho maá nú, Yāa ndée andiví.

²De ndiviī nū mā jécuiñī nū jā jícān táhvī nū, chí ndito coo inī nū jíín, de nacuetáhvī nú nūū Yāā Dios.

³De suni cācān táhvī nū jēhē ndá nī, jā ná sáhá Yāā Dios jā coo cā modo jā nacani nī tūhun, tácuā cuu cāhān nī tūhun Cristo jā ní nchiyuhū, jāá nduú ní jíín nchivī janahán. De sīquī tūhun ñúcuán cúu jā yíhí nī vecāa.

⁴De cācān táhvī nū jā cuu cāhān cājí nī nāsa cánuú cāhān nī.

⁵Sáhá ñuncúún vāha ndá nú jíín nchivī jāá nduú cándíja. Mā cúhuun inī nū sīquī jī, chí cundihvī inī nū scándíja nú jī.

⁶De níní cāhān vāha nú jíín nchivī, de cāhān nū tūhun jā cuetínú jā quendōo vāha jī sáhá. De cani inī nū nāsa vāha nascócóo nú tūhun nūū iin iin jī.

Saludo jā sándihí

⁷Tíquico cúu iin hermano jā mānī ō jíín, de tēe squíncuu vāha jā chíndeé táhán jíín nī cúu dē, de sátínú dē jíín nī nūū maá Jētohō ō. De maá dē cachī tūhun ndihi nūū nū nāsa cuāhān tiñu nī.

⁸Jā ñúcuán nī ntají nī dē cuēē dē nūū ndá nú, tácuā cunī nū nāsa íyó ndá nī jíín tiñu, de coo ndeé inī nū sáhá dē.

⁹De suni cuēē Onésimo jíín dē, tēe cúu táhán ndá máá nú. De cúu dē hermano jā squíncuu vāha jā mānī ō jíín. De ndúū dē cachī tūhun nūū nū nāsa cuāhān ndācá tiñu ichi cháhá.

¹⁰Sáhá ndeé inī ndá nú, cáchī Aristarco, tēe yíhí jíín nī vecāa. De suni súcuán cāhān Marcos, ñanī primo Bernabé. De ja nī ndacu nī tiñu nūū ndá nú sīquī Marcos, de tá cuēndēhé dē ndá nú de sáhá vāha nú jíín dē.

¹¹De suni súcuán cāhān Jesús, tēe jā suni nání Justo, jā sáhá ndeé inī ndá nú. De ndá máá dē-nī cúu tēe hebreo jā cándíja jā chíndeé táhán nācani tūhun jíín nī sīquī nāsa tátúnī Yāā Dios. De íyó ndeé ndasí inī nī sáhá ndá dē.

¹²Sáhá ndeé inī ndá nú, cáchī Epafras, tēe jā cúu táhán ndá nú, de mozo Cristo cúu dē. De níní jícān táhvī ndasí dē jēhē ndá nú, jā ná cuíñi nīhin nú, de cuja vāha inī nū jā squíncuu vāha nú ndihi tiñu jā cúnī Yāā Dios.

¹³Chí cāhān ndāā nī jā ndíhvī ndasí inī dē jēhē ndá nú, jíín jēhē nchivī ñuū Laodicea jíín Hierápolis.

¹⁴Lucas, tēe cúu médico jā mānī ō jíín, suni cāhān dē jā sáhá ndeé inī nū, de suni súcuán cāhān Demas.

¹⁵Cachī ndá nú nūū ndá hermano ñuū Laodicea jā sáhá ndeé inī jī, cáchī nī. De suni súcuán cāhān nū jíín Ninfas, jíín ndācá nchivī cándíja jā ndútútú vehe ña.

¹⁶De tá nī jīnu nī ncahvi ndá nú carta yáhá, de suni tetínú nú cahvi nchivī cándíja ñuū Laodicea. De suni cahvi ndá máá nú carta jā cuāhān nūū nchivī Laodicea jā ndiji nūū nū.

COLOSENSES 4

¹⁷De cachī nū nūū Arquipo jā nducú ndée dē squíncuu dē tiñu jā ní ntee Jētohō ō sīquī dē, cáchī nī.

¹⁸Nduhū Pablo, yáhá-nī cúu jā téé nī jín ndahá maá nī, jā sáhá ndée inī ndá nú. De nūcūhun inī ndá nú nduhū jā yíhí nī vecāa. De ñúhún inī nī jā ná sáhá cā Yāā Dios jā váha ndá ndóhó. Súcuán ná cóo. Amén.